

摛藻堂四庫全書薈要

集部

欽定四庫全書叢要

集部

御選宋詩卷二十六

詳校官原任主事臣李斯咏

欽定四庫全書薈要卷一萬八千三百三十三集部

御選宋詩卷二十六

七言古詩二

欽舜魚

贈釋祕演

高車大馬闢上京釋曰演者何聲名當年余嘗與之語
實亦可喜無俗情作詩千篇頗振絕放意吐出吁可驚
不肯低心事鐫鑿直欲澹泊趨杳冥落落我儒坐滿室

共論愁若木陷釘賣藥得錢輒沽酒日費數斗同醉醒
傷哉不擲被佛縛不爾烜赫為名卿數年不見今老矣
自說厭苦居都城垂頤孤坐若癡虎眼吻開合猶光精
雄心瞥起忽四顧便擬擊浪東南行開春余行可同載
相與曠快觀滄溟

中秋夜吳江亭上對月懷前宰張子野及寄君

謨蔡大

獨坐對月心悠悠故人不見使我愁古今共傳惜今夕

况在松江亭上頭可憐節物會人意十日陰雨此夜收
不惟人間重此月天亦有意於中秋長空無瑕露表裏
拂拂漸上寒光流江平萬頃正碧色上下清澈雙璧浮
自視直欲見筋脈無所逃遁魚龍憂不疑身世在地上
祇恐查去觸斗牛景清境勝反不足歎息此際無交游
心魂冷烈曉不寢勉為筆此傳中州

越州雲門寺

翠嶂環合封白雲中有蕭寺三為隣

雲門梁武帝所作今分為三寺相連

老松偃蹇若傲世飛泉噴薄如避人蒼猿嘯斷夜月古

丹花開遍陽崖春盤桓數日不忍去舟出邪溪猶慘神

往王順山值暴雨雷霆

蒼崖六月陰氣舒一霪暴雨如繩麤霹靂飛出大壑底
烈火黑霧相奔趨人皆喘汗抱樹立紫藤翠蔓皆焦枯
逡巡已在天中吼有如上帝來追呼震搖巨石當道落
驚嘵時聞虎與驅俄而青巔吐赤日行到平地晴如初
回首絕壁尚可畏吁嗟神怪何所無

依韻和伯鎮中秋見月九日遇雨之作

衆香愛春發枯荄我知惟動兒女懷天地昏酣醉夢裏
人有爽思皆沈埋豈如秋風勁利劇刀劍刮破天膜清
光開衰根危蒂掃除盡辨別松竹并蒿萊青娥供霜洗
夜月兼以皓露驅纖埃常年此夕或陰晦今歲澄澈特
快哉是時呼賓賞此景漸見照我白玉杯清輝向人若
有意經歷窗戶猶徘徊放歌狂飲不知曉爛熳酌客山
岳頽時節飄流晦朔轉已覺九日來相催北軒隙地破

蒼蘚帶花移得黃金裁倒冠露頂坐狂客擷香咀藥浮
新醅最憐小雨灑疎竹與籟颭颭吹醉腮君時傳詩頗
精麗意若泥淖不得來開緘文采自飛動欲和但愧頑
無才久之黽勉強為答嫌春愛秋真可咍

和永叔琅邪山庶子泉陽冰石篆詩

一氣破散萬事起獨有篆籀含其真周鼓泰山壞已久
下至唐室始有人宗臣轉注得天法質雖渾厚氣乃振
人間所存十數處豐疎異體世共珍其中琅邪石泉記

比之他法殊不倫
鐵鎖闊連玉鈎壯曲處
力可挂萬鈞復疑蛟蚪植爪角
隱入翠壁蟠未伸近來俗眼苦不賞
惟有風月時相親紫微仙人謫此守
此地勝絕舊喜聞公餘往觀領賓從
獵獵畫隼搖青春遠休車騎步泉側
酌泉愛篆移朝昏揮弄潺湲玩點畫情通恍惚
疑前身作詩緘本遠相寄邀我共賦意甚勤昨承見教久閣筆
壓以大句尤難文永叔近以書戒余作詩高風勝事日傾倒安得

身寄西飛雲

梅堯臣

余令之會稽新昌

越舸將渡西陵時臘雪欲作陰雲垂古岸潮迴夜冰閣
水上鯉魚紅尾鬚知君奉親聊自得窮冬涉險仍熙熙
縣民但可觀此意休羨江邊孝女碑

觀楊之美畫

天官乘車建朱旗赤旛前亞風卷披二龍緩駕蒼鬚垂
印箱傍挈文籍隨雙驂推輶如畏遲行從冠服多威儀

水官自有真龍騎兩佐並跨鯨魚螭步趨羣吏怪眼眉
雲生海面無端涯雷部處上相與期人身獸爪負鼓馳
後有同類挾且追次執電鏡風囊吹青蛇有角魚足髻
上下引導神所施地官既失不可知此畫傳是閻令為
設色鮮潤筆法奇絹理膩滑雞子皮吳生龍王多裂隳
八軸展玩忘晨炊李成山水曉景移黃荃花竹雀擁枝
韓幹馬本摸搘時神駿都失存毫釐日高腹枵眼眇眇
邂逅獲見何言疲厚謝主翁意不衰他日飽目看無遺

送吳照鄰都官還江南

霜前江水磨碧銅岸背菱葉翹赤蟲吳郎鬢絲蒼幾縷
不羞月上扶桑東羞見清波照人影去時黑髮吹春風
五年歸來婦應喜從此不問西飛鴻

采芝

蝟毛蒼蒼磔不死銅盤蠶蠶釘頭生吳雞鬪敗絳幘碎
海蚌吐出真珠明磨沙漉水草殼滑研桂煮金風波聲
齒如編貝嚼明月曼倩不復饑腸鳴莫論一斛貴與賤

堂上狼籍無由行

二十四日江鄰幾邀觀三館書畫錄其所見

五月祕府始暴書一日江君來約予世間難有古畫筆
可往共觀臨石渠我時跨馬冒熱去開櫨發匣鳴鑰魚
義獻墨迹十一卷水玉作軸光疏疏最奇小楷樂毅論
永和題尾付官奴又看四本絕品畫戴嵩吳牛望青蕪
李成寒林樹半枯黃荃工妙白兔圖不知名姓貌人物
二公對奕旁觀俱黃金錯鏤為投壺粉障復畫一病夫

後有女子執巾裾牀前紅毯平圍爐牀上二姝展氍毹
繞牀屏風山有無畫中見畫三重鋪此幅巧甚意思殊
孰真孰假丹青模世事若此還可吁

送弟禹臣

王都寓居樹陰少惟有牆隅兩株棗去年相見棗花開
今年相別棗實好棗實未剥風莫吹我鬢愁多似蓬葆
淮南到時何所逢秋葉蕭蕭蟹應老憶昔共歸江上初
對飲蘆洲月如縞半夜魚跳鏡破光萬事觸然何足道

自此重經二十秋不改青青岸旁草

和宋中道元夕

結山當衢面九門華燈滿國月半昏春泥踏盡遊人繁
鳴蹕下天歌吹喧深坊靜曲走車轅爭前鬪盛忘卑尊
靚妝麗服何柔溫交觀互視各吐吞摩肩一過難久存
眼尾獲笑迷精魂貂裘比比王侯孫夜闌鞍馬相馳奔

使風

跨下橋南逆水風十幅蒲帆彎若弓淮波帶日魚鱗紅

岌岌飛上北斗中龜山始撞人定鐘岸草滋滋鳴秋蟲

乾明院碧鮮亭

壞衣削髮遠塵垢蛇祖龍孫生屋後不等渭川千戶侯
尺椽片瓦何嘗有方丈東頭一畝餘中軒四面無窗牖
青瓊作枝鉏為葉丹鳳未食蒼鼠走細藤織榻白晝眠
寢濃鼻息如雷吼世間百事不歷心門外寒流徹溪口
得餘干李尉書錄示唐人干越亭詩因以寄題
餘水之干越之鄙築基相對琵琶尾琵琶日日有秋聲

鴈過洞庭風入葦南斗戛湖波不起長刀剗峰碧耳耳
嬪娥夜出在寒溪青銅瑩磨光幾里朝因吳客幅蒲輕
滿帛如蠶書可喜

南軒盆植重臺蓮移種池中

彤雲赤霧生緒房朝霞變蕖朱粉光白玉入泥不滿盞
羽蓋裏露明月璫濁水一石亂鼉鼈鑿池五丈如斗方
萍根科斗得自在荷芰明年出水央

設鱠示坐客

汴河西引黃河支黃流未凍鯉魚肥隨鉤出水賣都市
不惜百金持與歸我家少婦磨寶刀破鱗奮髻如欲飛
蕭蕭雲葉落盤面粟粟霜葡萄為縷衣楚橙作釐香出屋
賓朋競至排入扉呼兒便索沃腥酒倒腸飲腹無相譏
逡巡餅竭上馬去意氣不說西山薇

十月十八日

霜梧葉盡枝影疎井上青絲轉轆轤西廂舞娥艷如玉
東栢貴郎才且都纏頭誰惜萬錢錦映耳自有明月珠

一為轆轤情不已一為梧桐心不枯此心此情日相近

卷起飛泉注玉壺

龍女祠祈順風

龍母龍相依風霜隨所變舟人請予往出廟旗脚轉旗
指西南歸飛帆疾流電長蘆江口發平明白鷺洲前已
朝膳竹根盃皎不欺人世間然諾空當面

邵郎中姑蘓園亭

吟愛樂天池上篇買池十畝皆種蓮薄城萬竿竹嬋娟

藤纜繫橋青板船折腰大菱不直錢鷓鴣瀨鶼沙際眠
水從太湖根底穿月出洞庭山上圓公歸與客相留連
秋風鶴唳春杜鵑班鱸斫膾紅縷鮮紫豉煮純香味全
我思白傅在三川吳船雖有吳饌偏當時九老各華顛
裴令來過吟復聯至今怪石存舊鐫七葉樹蔭黃金田
羨公有子勝昔賢高門通車千萬年

觀王氏書

先觀雍姬舞六么妍葩發豔春風搖舞罷英英書大字

玉指握管濃雲飄風馳雨驟起變怪文鯢畫飛明珠跳
席客聚立驚且歎筆何勁健人柔夭昔時裴曼能舞劍
丹青助氣精神超藝雖不同意有會世事相假非一朝

寄題沈比部江洲齊雲樓

遠目不高不可極朱樓要與浮雲齊江流萬古平泱莽
山雨一過寒淒迷賈客檣下望吹笛漁郎浦前看斷霓
飲飛射蛟水花伏高士種柳烟條低羣雁有時至自北
洪潮到此不更西君家隱侯有八詠風雅未盡留人題

送次道學士知太平州

春滿楊花撩亂飛春江鮎魚來正肥采石新林兒女去
茭白蒲牙艇子歸歸令煮魚不得熟已望使君船上磯
上磯亦不待潮應爭牽蓑纓泥污衣姑熟溪頭撻大鼓
紅抹靴刀趨俯僂牙兵可擬岸旁蘆森森甲立雄南土
更得西州謝法曹新詠定多傳樂府

金陵有美堂

李白愛山如洛陽三益為歌愁日長廢基臺殿不可識

玉燕舊棲王謝堂公來碧瓦起棟宇羅列圖書牙作牀
池頭古月城下江照見萬里冰雪光江流不盡月不死
寒浪素影東西翔願公樂此殊未央慎勿區區思故鄉

蔡襄

御筆賜字詩

皇華使者臨清晨手開寶軸香煤新沿名與字發深旨
宸毫灑落奎鈞文精神高遠照日月勢力雄健生風雲
混然氣質不可寫乃知學到非天真緘藏自語價希代

誰顧四壁嗟空貧臣聞帝舜優聖域臯陶大禹為其鄰
吁俞勅戒成典要垂覆後世如穹旻陛下仁明如舜禹
豪英進用司鴻鈞臣襄材智最駕下豈有志業通經綸
獨是丹誠抱忠樸常欲贊奏上古珍又聞孔子春秋法
片言褒貶賢愚分考經內省不自稱但思至理書諸紳
乾坤大施入洪化將圖報効無緣因誓心願竭謨謀義
庶裨萬一唐虞君

至和雜書五首

首錄四

八月一日

淮天過盡入吳渠蘭亭晚日光疎疎金桃傅粉好顏色
綠醶泛濫深車渠觥巡屢卷明星出花翹零落隨衣裾
么絃不動凝古意春容淺破長眉舒庭院簾帷一齊下
紅蠟陰沈霜滿瓦雞頭軟熟七月終舉手分傳玉盈把
席前碧甕覆瑤漿一秋愁淚風前灑雲中寶暉萬重高
付與輕綃藏冰麝孤城寒柝夜迢遙誰道劉郎有天馬
歸來却問東海桑海浪漫漫彩虹挂紅絲紫膾曉刀鳴

雙龍笑斷夢中驚莫將團扇掩塵匣曾障清歌十數聲

八月二日

濃雲瞥過雙鳳飛清顏照射朝日暉畫船南畔烟成障
鮮荷掩護仙銖衣凝魂杳渺不知處酒醺香破驚新知
一聲入耳醉人骨天容牢落星點稀海山萬里風濤外
扶桑未老成春絲春絲不斷紫成結玉環宛轉無窮時
曉簾半上香飄穗笑指冰壺凝遠淚秦樓後夜鏘孤鸞
秋風不動烏龍睡願將瓊樹隔花看一一花房暗相值

濁水芙蓉天際雲長時倚望清江濱迎來未語送歸遠
暮山紫翠空含嚬勸君美酒千萬壽情如芳草年年新

八月九日

曉虹跨江一千尺平浪東西入天碧遊人初覺秋氣涼
衣不禁風薄羅窄漁家小艇方醉眠艇裏長魚三尺白
彩欄比倚數流螢似與流螢舊相識香脂揩盡暗成雲
銀甲試絃初未直橋前流水聲潺潺年華一去何時還
重來若問桃花路記取松亭月影間

八月十二日

高樓中天月色淨玉山禾熟秋雲淡草邊水際見流螢
獨自尋香徑稜層雁塔挂千燈密意雖通語還併
城上驚烏飛復啼落泊無依終不定欲下長橋夜漏深
燭臺飄焰青梧陰仙人若也乘鸞去彩霧千重處處尋

寒食梨花下小飲

江南寒薄春嘗早花卉入春先自老嗟余衰病不及時
出見池園半青草縱有餘葩在葉間行看落片隨風掃

尋春已過索寞歸重憶歡娛耿懷抱雖然妖艷難再得
但只逢花須醉倒二月中央寒食朝牆隈忽見梨花飄
開門四顧粲然白傅催翠帯賓朋招長吟環繞不知數
漸值明月臨清霄誰剪輕雲成碎葉天留密雪封枯條
重重盡挂珠纓絡簌簌初呈箇步搖傍花行酒發新唱
滿座列舉黃金瓢西都姚黃高一尺揚州寶髻分雙翹
幽香絕艷信尤物設欲置之千里遙屏門寫生亦名畫
未免五彩塗鮫綃莫如此君慰人意相對一笑開無憊

古來英豪多感激坐使綠鬚朱顏凋勸君且作梨花飲
慎勿稱量別流品

龔宗元

夜宴

兔魄侵階夜三刻蜀錦堆香花院窄風動簾旌玳瑁寒
露垂蟲網珍珠白美人正席羅絃管綺帳雲屏爐麝煖
只恐金壺漏水空不泊鸞觴琥珀滿勸君莫負秉燭遊

曾見古人傷晝短

劉敞

寒林石屏風

屏風畫山皆任假寒林石屏自然者蒼紋紺脈亂交加
短樹高枝自瀟灑觀者寧知畫與非但怪奇妙非人為
又疑古苔著石瘦何得本末無纖遺桑田變海松栢死
寒暑不及榮枯期佳哉大鈞育羣類挺鎔精巧無巨細
天真道貌皆生成俗師筆墨空形似居人幽獨最相宜
樸厚遠謝雕鏤姿城中雲母屏更好慎勿浪示豪家兒

雨過前軒偶作

卷二十一

江南羈客懷鄉里晚起前軒對零雨清波滿目如鑑中
遙岸高松十餘樹砌旁芳草似汀州巉巖殿角飛紅樓
沈光倒影入浪底宛是若耶溪上頭薄霧疎烟迷近遠
水色誰能辨深淺忽驚謝去塵中游不知正是居京輦
何人草服倚長松迴頭誤問釣魚翁眼前景致偶相向
豈異仙術遊壺中

狄遵度

和漁之深秋月夜書事

洞庭葉下涼颼颼
凍天頑白凝不流
圓月擬缺不忍缺
輕露欲浮終未浮
憶吹朱簫鳳輶上
更採紫芝雲嶠陬
玉樓天半幾千尺
珠樹玲瓏懸上頭

黃庶

遊石甕寺

泉飛自有迎客意
聲到山前入人耳
泉聲引行不知疲
石路磽確折屐齒
長安睫滿車馬塵
林蟲夜夜來夢寐

雲煙郊原鋪古圖心眼開快明如洗渭流屈曲成大篆
書破野色為綠紙丘墟沈吟古興廢秋風正入紅樹起
折碑斷垣卧荆棘意思紛亂不可理窮幽更下蒼崖根
把酒坐聽潺湲醉山房似欲勸苦飲時散清香入人鼻
奔走恨不身長遊嘉寫姓名藏薜荔

登見山樓

太守終南為客主出入厭倦馬與車與山朝夕欲還往
作樓近在室一隅主人去久山寂寞正值青帝摧焦枯

我拘簿書甚杻械罷脫步上提酒壺郊原猶未見春色
似據水墨長安圖也知好景天更惜高峰常是雲模糊
安得風伯持大箋掃洒百里如屏鋪顯昧萬狀古詩國
收拾可禿千毫書我來願作風雅戶醉倒坐待明月扶
去家若有巖下夢免得夜夜尋歸途

遊石池潭

吾家溪潭動百尺坐見遊魚可倒指月明無風水不動
釣絲鑑中出朱鯉乘閒具酒席草岸呼網一舉常百尾

鱠霜炙玉眠鴟夷樹挂落日醉不起幾年手板負青山
趁魚舷聲不入耳涼秋九月役吏事瘦馬奔走黃葉裏
有酒不得好景飲訪古或問芻牧子指我石池十里近
蒼苔裏崖碧無底楚王北遊歎寂寞創奇造幽有遺址
舞陽民傳楚襄王遊此臨河以石為池我來徘徊知是否興廢盡可付流水
鬢鬚故溪在吾目濯手漱齒有餘思開樽喜與風景遇
蘆花入盃勸人醉漁翁有意助酒卮青竹盡日垂空餌
我疑溪靈斬異景不遣紅鱗滿人意人生天地未歸客

計較貴賤羞犬彘當須醉倒載月歸不信鄉夢留不止

蘓洵

丙申歲余在京師鄉人陳景回自南來棄其官
得太子中允景回舊有地在蔡今將治園圃於
其間以自老余嘗有意於嵩山之下洛水之上
買地築室以為休息之館而未果今景回索詩
遂道此意景回志余言異日可以知余之非戲
云爾

岷山之陽土如腴江水清滑多鯉魚古人居之富者衆
我獨厭倦思移居平川如手山水戲忍我後世鄙且愚
經行天下愛嵩岳遂欲買地安妻孥晴原漫漫望不盡
山色照野光如濡民生舒緩無夭札衣冠堂堂偉丈夫
吾今隱居未有所更後十載不可無聞君厭蜀樂上蔡
占地百頃無邊隅草深野闊足狐兔水種陸收身不劬
誰知李斯顧秦寵不獲牽犬追黃狐今君南去已足老
行看嵩洛當吾廬

曾鞏

送李撰赴舉

湖水碧槐花黃山川搖落窗戶涼宿雲星稀日東出青
冥風高雁南翔華堂昨夜讀書客匹馬今朝遊大梁風
鎛拂塵見飛影犯猩驚人持夜光康衢四闢通為里天
駟得地方騰驤我留東山意頗卓屏棄外慮無毫芒子
能相從味沖漠捉箋勿暫遲歸裝

喜晴

天晴萬里無纖風江平水面磨青銅光華逸發萬物上
精氣夏與扶桑通我行江漢道苦惡十步九折遺西東
況遭積雨駕高浪沙翻石走相撞春操舟衆工立噤岸
濕櫓鑽火磨星紅荒蹊成澗尺寸礙永日四望無人蹤
一時得意數蛙鼴鳴躍振跔泥塗中陰消陽勝有先兆
宇宙丹翠含沖融今晨霾睜一埽蕩羲和徐行驅六龍
眼明意豁萬事快預喜來年麰麥豐

東津歸催吳秀才寄酒

荒城嬾出門常掩春氣欲歸寒不斂東林咫尺猶不到
況乃傍溪潭石險風光得暖才幾日不覺溪山碧於染
欣然與客到西岸衣幘不避塵泥點谷花洲草各萌芽
高下迸出如刻劙梅花開早今已滿若洗新妝竟妖臉
柳條前日尚憔悴時節與催還荏苒沙禽翅羽亦已好
爭趁午暄浮翠澈從今物物已可愛有酒便醉情何慊
君厨山杏舊所識速致百壺須灑灑心知萬事難刻畫
惟有醉睡知不忝預愁酩酊苦太熱已令灑屋鋪風簾

送豐稷

桃花染破南山青漢江此時春水生客舟相語人夜起
勁艣亂江羣雁聲知君漂泊動歸思告我舉裝千里行
宏材壯志風雨發綠鬚少年冰雪清讀書一見若經誦
下筆千言能立成精微自得有天質操行秀出存鄉評
嗟從薄祿因流滯能誘鄙俗銷紛爭弦歌躬勸士強學
田里堵安人力耕嗟余據按但畫諾遇事束手方蒙成
雖知璞玉難強獻欲挂塵榻空含情歲寒不變乃知確

物理先否終當亨維舟且盡今夕語明日帆隨百鳥輕

聽鵠寄家人

鵠聲啞啞寧有知家人聽鵠占歸期物情固不等人事
爾意自驚思別離秋風粲粲正可愛黃菊芙蓉開滿枝
春風千樹變顏色遠水靜照紅霞衣梧桐楊柳豈知數
沙步露冷銀牀欹新黃暗綠各自媚爛漫未減春風時
誰言秋物不可賞人意自移隨盛衰山田正冷酒味美
禾黍半收雞鶩肥霜梨野栗處處有雪蜜薦口清香隨

鄉園物物可想見我意祇隨魂夢飛家人未用占鵲語
應到歸時春亦歸

芙蓉臺

芙蓉花開秋水冷水面無風見花影飄香上下兩嬋娟
雲在巫山月在天清瀾素礫為庭戶羽蓋霓裳不知數
臺上遊人下流水柱脚亭亭插花裏欄邊飲酒擢女歌
臺北臺南花正多莫笑來時常著屐綠柳牆連使君宅

司馬光

朝雞贈王樂道

小雞距短雙翅垂廣場勇鬪無所施清曉長鳴獨先衆
朝者恃此能知時星河滿天月光白東望扶桑悄無色
一聲高舉耳目醒四遠羣陰俱辟易陋巷人疎煙火稀
永夜沈沈鐘鼓微聞之徐起就盥櫛顛倒不復憂裳衣
君家迥居北城曲阿閣嶢嶢日鳴玉蕭蕭風雨得司晨
不使無功啄君粟

懷素書

上人工書世所稀於今散落無復遺君從何處獲數幅
敗絹蒼蒼不成軸雲流電走何縱橫昏醉視之雙目明
烈火燒林虎豹慄疾雷裂地龍蛇驚須臾掛壁未收卷
陰風颯颯來吹面祇疑神物在闇中寶祕不令闕俗眼
嗟余平生不識書但愛意氣豪有餘欲求數字置座側
安得滿斗千金珠

道傍田家

田家翁嫗俱垂白敗屋蕭條無壯息翁攜鎌索嫗攜箕

自向薄田取黍稷靜夜偷春避債家比明門外已如麻
筋疲力盡不入腹未議縣官租稅促

王安石

純甫出釋惠崇畫要予作詩

畫史紛紛何足數惠崇晚出吾最許旱雲六月漲林莽
移我翛然隨洲渚黃蘆低摧雪翳土鳧雁靜立將儔侶
往時所歷今在眼沙平水澹西江浦暮氣沈舟暗魚罟
欹眠嘔軋如聞櫓頗疑道人三昧力異域山川能斷取

方諸承水調幻藥灑落生綃變寒暑金坡巨然山數堵
粉墨空多真漫與大梁崔白亦善畫曾見桃花淨初吐
酒酣弄筆起春風便恐漂零作紅雨鶯流深枝婉欲語
蜜蜂掇蕊隨翅股一時二子皆絕藝襄馬穿羸久羈旅
華堂豈惜萬黃金苦道今人不如古

春日晚行

門前楊柳二三月枝條綠烟花雪白呼童羈我果下驅
欲尋南岡一散愁緣岡初日溝港淨與我門前綠相映

隔淮仍見裊裊垂立怡悵去年時杏花園西光宅路
草暖沙晴正好渡興盡無人楫迎我却隨倦鷗歸薄暮

寄朱昌叔

西安春風花幾樹花邊飲酒今何處一杯塞上看黃雲
萬里寄聲無雁去世事紛紛洗更新老來空得滿衣塵
青山欲買江南宅歸去相招有此身

移桃花示俞秀老

舍南舍北皆種桃東風一吹數尺高枝柯蔥綿花爛熳

美錦千兩敷亭臯晴溝漲春綠周遭俯視紅影移漁舠
山前邂逅武陵客水際鬢鬟秦人逃攀條弄芳畏晚晚
已見黍雪盤中毛仙人愛杏令虎守百年終屬樵蘿手
我哀此果復易朽蟲來食根那得久瑤池絶誰見有
果入花時且追酒君來酩酊相隨否

張良

留侯美好如婦人五世相韓韓入秦傾家為主合壯士
博浪沙中擊秦帝脫身下邳世不知舉國大索何能為

素書一卷天與之穀城黄石非吾師固陵解鞍聊出口
捕取項羽如嬰兒從來四皓招不得為我立棄商山芝
洛陽賈誼才能薄擾擾空令絳灌疑

送春

武陵山下朝買船風吹宿霧山花鮮萬家笑語橫青天
綺窗羅幕舞嬋娟小鬟折花叩船舷玉琰瀉酒醸金錢
朱甍飛動浮雲歛天外筦簫來宛轉斷橋人行夕陽路
樓觀琉璃影中見酡顏未分驛鶻催燭入坐客猶徘徊

豈知閭閻門邊住春盡不見芳菲開日月紛紛車走阪
少年意氣何由挽洞庭浪與天地白塵昏萬里東浮眼
黑貂裘敝歸幾時相見綠樹啼黃鸝榮華俯仰憂患隨
命駕吾與高人期

虎圖

壯哉非熊亦非羆目光夾鏡當坐隅橫行妥尾不畏逐
顧盼欲去仍躊躇卒然我見心為動熟視稍稍摩其鬚
固知畫者巧為此此物豈肯來庭除想當槃礴欲畫時

睥睨衆史如庸奴神閒意定始一掃功與造化論錙銖
悲風颭颭吹黃蘆上有黃雀驚相呼槎牙死樹鳴老烏
向此俛嚼如哺雛山牆野壁黃昏後馮婦遙看亦下車

陳橋

走馬黃昏渡河水夜爭歸路春風裏指點韋城太白高
投鞭日午陳橋市楊柳初回陌上塵胭脂洗出杏花勻
紛紛塞路堪追惜失却新年一半春

奉使道中寄育王山長老常坦

道人少賈海上遊
海舶破散身沈浮
抱金滿篋人所寄
吹簫偶得還中州
贏身歸金不受報
祇取斗酒相獻酬
歡娛慈母終一身
脫棄妻子藏巖幽
蒼煙寥寥池水漫
白玉箇箇吹高秋
夜燃柏子煮山藥
憶此東望無時休
塞垣春枯積雪流
沙礫盛怒黃雲愁
五更匹馬隨雁起
想見鄆郭花今稠
百年夸奪終一丘
世上滿眼真悠悠
寄聲萬里心綢繆
莫道異趣無相求

送程公闢守洪州

畫船插幟搖秋光鳴鏡傳鼓水洋洋豫章太守吳郡郎
行指斗牛先過鄉鄉人出郭航酒漿魚鼈鱠魚炊稻梁
芡頭肥大菱腰長醻醻喧呼坐滿牀怪君三年滯瞿塘
又驅傳馬登太行纓旄脫盡歸大梁翻然出走天南疆
九江左投貢與章揚瀾吹漂浩無旁老蛟出水風助狂
盤渦忽坼千丈強君聞此語悲慨慷迎吏乃前持一觴
鄙州歷選多僞良鎮撫時有諸侯王拂天高閣朱鳥翔
西山蟠繞鱗鬚蒼下視城塹真金湯雄樓傑屋鬱相望

中戶尚有千金藏漂田種秔出穰穰沈檀珠犀雜萬商
大舟如山起牙檣輸瀉交廣流荆揚輕帛利屣列名倡
春風跕謻能斷腸平湖灣塢煙渺茫樹石珍怪花草香
幽處往往聞笙簧地靈人秀古所臧勝兵可使酒可嘗
十州將吏隨低昂談笑指揮回雨暘非君才高力方剛
豈能跨有此一方無為聽客欲霑裳使君謝吏趣治裝
我行樂矣未渠央

彭蠡

茫茫彭蠡春無地白浪春風溼天際東西接旆萬舟回
千歲老蛟時出戲少年輕事鎮南來水怒如山帆正開
中流蜿蜒見脊尾觀者膽墮余方咍衣冠今日龍山路
廟下沽酒山前住老矣安能學佽飛買田亟棄江湖去

董伯懿示裴晉公平淮右題名碑詩用其韻和

酬

元和伐蔡何危哉朝廷百口無一諧盜傷中丞偶不死
利劒白日投天街襄滄入相議軍旅國火一再更檀槐

上前慷慨語發涕誓出按撫除睽乖指撝光顏戰泗曲
闢如怒虎搏虺豺懃能捕鹵取肝鬲護送密乞完形骸
笞兵夜半投死地雪溼不敢燃薪爇空城暨子已可縛
中使尚作嘵兒哇退之道此尤雋偉當鏤玉牒東燔柴
欲編詩書播後嗣筆墨雖巧終類俳唐從天寶運中圮
廊廟往往非忠佳諸侯縱橫代割據疆土豈得無離仳
德宗末年懲戰禍一矢不試塵蒙敦憲皇初起衆未信
意欲立掃除昏霾追還清明救薄蝕屢勅主府拘窮蛙

王師傷夷征賦空千里亦忌毫釐差小夫偷安自非計
長者遠慮或可懷桓桓晉公忠且壯時命適與功名偕
是非末世主成敗烜赫今古誰譏排賢哉韋純議北赦
倉卒兩伐尤難皆重華聲明彌萬國服苗干羽舞兩階
宣王側身內修政常武德立能平淮昔人經綸初若緩
欲棄此道非吾儕千秋事往蹤跡在巖石欵記如湘崖
文嚴字麗皆可喜黃埃蔽沒蒼蘚埋當時將佐盡豪傑
想此兵禱陪祠齋君曾西遷為拓本濡麝割蜜親剗揩

新篇波濤特浩蕩把卷熟讀迷津涯褒賢樂善自為美

當掛廟壁為詩牌

出鞏縣

昭陵落月煙霧昏
篝火度谷行山根
投鞭委轡涉數村
宿出鞏縣城東門
向南宮闕不可見
但有洛水流渾渾

書任村馬鋪

兒童繫馬黃河曲
近岸河流如可掬
任村炊米朝食魚
日暮榮陽驛中宿
投老經過身獨在
當時洲渚今平陸

秋黍冥冥十數家仰視荒蹊但喬木冰盤羹美客自知
起看白水還東馳爾來百口皆年少歸與何人共此悲

久雨

煤冶著天無寸空白沫上岸吹魚龍義和推車出不得
河伯欲取山為宮城門畫開眠百賈饑孫得糟夜哺翁
老人慣事少所怪看屋箕踞歌南風

汴水

汴水無情日夜流不肯為我少淹留相逢故人昨夜去

不知今日到何州
州州人物不相似
處處蟬鳴令客愁
可憐南北意不就
二十起家今白頭

憶北山送勝上人

蒼藤翠木江南山
激激流水兩山間
山高水遠魚鳥樂
車馬絕迹人長閒
雲埋樵聲隔蕙蓀
清月弄釣影臨潺湲
黃塵滿眼衣可濯
夢寐惆悵何時還

次韻酬微之贈池紙并詩

微之出守秋浦時
椎冰看擣萬穀皮
波工龜手咤今樣

魚網肯數荊州池霜紈奪手賈不售虹玉喪氣山無輝
方船穩載獻天子善價徐取供吾私十年零落尚百一
持以贈我隨清詩君寧久寄金穀地方執賜筆磨坳螭
當留此物朝上國日侍帝側書新儀不然名山副史本
褒拔元凱誅窮奇咨予文章非世用畫鏤空爾糜冰脂
揮毫才足記姓字竊學又恥從師宜息息點污亦何忍
嘉貺但覺難為辭篇終有意責趙璧窮國恐誤連城歸
傾囊倒篋聊一報安敢坐以秦為雌

明州錢君倚衆樂亭

侯君幕府開東部名高海曲人知慕艤船談笑政即成
洗滌山川作嘉趣平泉浩蕩銀河注想見明星弄機杼
載沙築成天上路投虹為橋取孤嶼掃除荆棘水中央
碧瓦朱甍隨指顧春風滿城金版舫來看置酒新亭上
百女吹笙彩鳳悲一夫伐鼓靈鼈壯安期羨門相與遊
方丈蓬萊不更求酒酣忽跨鯨魚去陳迹空令此地留

飲裴侯家

裴侯飲我日向中四座賓客顏皆紅掃除高館邀我入
自出糶麥憐民窮天邊眼力破萬里柔麻冥冥山四起
野心探尋殊未已更欲湔衣北城水忽見碧樹櫻桃懸
下馬恣食不論錢赤星磊落入我眼恐是半醉遊青天
裴侯方坐塵沙裏沒身救物當如此我曾偶脫簿領間
何忍愛惜一日閒且歸拂席飽眠睡明日更看滁南山

九井得盈字

汎崖涉澗三十里高下攀確無人耕捫蘿挽葛到山趾

仰見吹瀉何崢嶸餘聲投林欲風雨末勢卷土猶溪阮
飛禽凌競走獸慄霜雪夏落雷冬鳴野人往往見神物
鱗甲漠漠雲隨行我來立久無所得空數石上菖蒲生
中官繫龍沈玉冊小吏磔狗澆銀觥地形偶爾藏險怪
天意未必司陰晴山川在理有崩竭丘壑自古相虛盈
誰能保此千世後天柱不折泉常傾

寄題衆樂亭

陵陽遊觀吾所好恨不即過衆樂亭嘗聞髣髴如夢寐

吟筆自欲圖丹青千峯秀出百里外忽於其上崢嶈極
朝雲噓嵒日暖暖夜水落澗風泠泠春花窈窕鳥爭舞
夏木蔭鬱猿哀鳴潦收葉落天地爽海月影到山川明
籃輿晨出誰與適坐與萬物觀虛盈令思民事不忍後
田間笑語催蠶耕吏休歸舍獄訟少墟落飲酒欲秋成
惟愁一日奪令去出來老稚交逢迎彼民安知方祿仕
徒喜使我寬適征令知道義士林服遺愛豈用吾詩評

書會別亭

西城路居人送客西歸處年年借問去何時今日扁舟
從此去春風吹花落高枝飛來飛去不自知路上行人
亦如此應有重來此處時

僧德殊家水簾求予詠

淙淙萬音落石巔皎皎一派當簷前清風高吹鸞鶴唳
白石下照蛟龍蜒浮雲妝額自能卷缺月琢鉤相與懸
朱門試問幽人價翡翠鮫綃不值錢

復至曹娥堰寄剡縣丁元珍

溪水渾渾來自北千山抱水清相射山深水急無艇子
欲從故人安可得故人昔日此水上樽酒扁舟慰行役
津亭把手坐一笑我喜滿懷君動色論新講舊惜未足
落日低徊已催客離心自醉不復飲秋果寒花空滿席
今年却坐相逢處怊悵難求別時迹可憐溪水自南流
安得溪船問消息

登越州城樓

越山長青水長白越人長家山水國可憐客子無定宅

一夢三年今復北浮雲縹緲抱城樓東望不見空回頭
人間未有歸耕處早晚重來此地遊

御選宋詩卷二十六

欽定四庫全書
薈要卷一萬八千三百三十四集部

御選宋詩卷二十七

七言古詩三

韓維

讀杜子美詩

寒燈熠熠宵漏長顛倒圖史形勞傷取觀杜詩盡累紙
坐覺神氣來洋洋高言大義經比重往往變化安能常
壯哉起我不暇寐滿座歎息喧中堂唐之詩人以百數

羅列衆制何煌煌太陽垂光燭萬物星宿安得舒其芒
讀之踴躍精胆張徑欲追蹕忘愚狂徘徊攬筆不得下
元氣混浩神無方

對雨思蘇子美

五月陰盛暑不效飛雲日夕起嵩少回風颯颯吹暮寒
翠竹黃蕉雨聲閑北軒孤坐默有念人生會合那可料
昔與子美比里間是月秋近足霖潦吾徒無事數相過
日策疲馬度深淖升君之堂伏君几果餌羅列亦稍稍

開尊得酒味已醉輔以諧謔聊可酬長歌激烈或孤起
大論紛紜時一譟颯然夜氣變淒栗連披袒褐曳顛倒
且欣主人同氣類安問鄰家厭呼笑而今相望各千里
跕促有如魚在罩人生此樂不易得世事榮辱何足校
行當結侶候春水一訪洞庭湖上棹

孔先生以僂長老山水略錄見約同遊作詩答

之

羣峰羅立青巖巖中有佛廟名香嚴飛泉洶湧出峰後

四時激射喧蒼巖跳珠噴雪幾百丈下注坎險鍾為三
援蘿頗瞰石底淨明鏡光溢青瑤函淙流四走渠與竇
左右吞嚥何其饑緣源散討不知極但見洞穴爭巔嵌
攀藤直上出雲背巖戶閉邃疑神緘仰窺陰洞看懸乳
白龍垂鬚正盤鬢或凝如蓋覆宛宛或散如指長掺掺
有臺高下且十數如以勢位相臨監平鋪老蘚柔可坐
雖藉綠罽遺不拈北山之石何瑣碎形制一一如鑄鑊
叩之清越諸谷應不意此地聞韶咸已霜桂樹垂凍辟

未臘梅蕊輝晴嵐浮屠曰仙好事者奄有勝跡窮搜探
書之遠寄龍山下云此僅止存都凡先生以本來示我
謂我所好同甘鹹相期厯覽在他歲事高意篤非予堪
人生蕭散不易得常苦世累為羈銜吾徒幸當治平日
况又無事於牽貪便須巾車不可後願以几杖從君南

奉同原甫槐陰行

天門觀闕雙凌霞下有馳道開平沙高槐左右覆朱栏
綠陰翠氣相蒙遮朝回亘雲下寶騎游散掣電奔香車

吾慙太學官况冷旦暮出此驅疲騶清風吹涼南就局
炎日轉景東還家昏然百事不知省空復春葉零秋華

次韻和平甫同介甫當世過飲見招

炎風得秋亦已涼喜挹塵策羅南窗策中古人不可見
獨詠君子予心降高文大論日傾吐響快有類鐘應撞
却嗟吾儕多暇日俚謠暴謔何其嗚驅車正得我所念
起具肴簌陳杯缸自憐愚慙接豪邁敝履乃與華冕雙
聖經王道有本末斟挹醇粹揮其危須臾上下今與古

武庫搜搜干矛鋒
疑懷滯義一開豁有如暗室來明釭
馮侯抗議亦殊健短鈎長鉤相撐縱介卿後至語閒暇
偃載戈甲韜旌幢弱弓枉矢尚何用久已束手甘避遙
是時君有山陽役扁舟已具河之矼朝吟淮山翠撲撲
夜夢楚水鳴淙淙軒然欲去坐所惜文字雅正姿信慄
行年三十不得飽况有薦道登朝邦遂令奔放不自斂
欲侶魚鈎終湖江朝廷搜賢無遠近北盡塞漠南嶺瀧
如君才大齒且壯安可推亮而居龐來詩云孔明勿問襄陽龐功名

得時看樹立豈若都尉看空庵

答賀中道燈夕見詒

春風揭屋沙激窗兀然孤坐如植杠酒昏兩眸澀不視
案上書策徒縱縱獨待高篇恣哦詠頓覺精銳還軀腔
前時官家不禁夜九衢鼈鼈燒明缸綵山插天衆樂振
游人肩摩車轂撞君于此時守經籍直欲行業純不危
想初嘉句落紙際筆下滾滾來長江我今散懶世味薄
惟於靜者心為降江翁蕭閒梅老澹文字酬酢交矛鋌

恨無奇麗與鬪角日策疲馬參其雙能來相從不憚數
與子賦詩傾酒缸

范純仁

次韻曼叔見寄

予生三十愚且憲樂善自許人難雙前年杞城拜夫子
似處幽蔀逢明缸交情期與道義久第媿蟻蛭臨崆峩
兵厨得酒不自飲攜挈過我盈尊缸追游頗縱山水樂
涼風皓月臨溪矼長歌高嘯助清景徹曙未肯回艤艤

別來節物皆一換秋風慘櫃陵蹠窗韓庵幽蓮隨紅粉

崔榭密竹森雲幢過從往往臻靜默兀坐終日如枯椿

得君新詩成杼軸目未窮紙心先降指摘萬象無不到

發慮百中如甘逢搜情引思勉欲和畎溜豈合追湍瀧

念君懷道滯山邑誰者肉食居高龐方今明聖締堂構

采將材幹恢鴻厖長松偃蹇臥澗谷梓匠誰與來扶扛

入登明堂柱九室氣象凜凜尊家邦復使天下貴儒術

頌聲千載長錚淙

同王弱翁宿廣化寺

能知真樂唯吾曹聲利外物誠無撓深山窮谷苟遂性
膚體不厭常枯焦況如佳景擅天巧會與仁友相邀
龍門伊洛古今勝蒼巒翠壁雙岩堯疏鑿穴見神禹跡
懷襄既又熙堯朝千龕萬宇變佛室鐘磬梵唄何喧囂
唐僧無畏號神雋當時聲勢尤翹翹開山撥壞盡奇秀
樓殿勢若風中飄高甍垂空插雲翼連閣跨路馳星橋
深沉神物潛擁護顯敞燕雀如矜驕搜奇選勝幸遲日

禪堂解榻眠清宵灘聲蕭蕭雜羣籟天真不啻聞咸韶
凌晨攜策度翠巒竹溪深處從僧招融融朝暉射巖谷
雜花爛熳紅欲燒令人即欲置萬累百年盡向游中消
乃知神仙有窟室我意已欲陵煙霄

和王微之赴韓持國燕集

頴川太守無羈束為政課卑纔第六里中耆舊六七翁
漸閑勇退皆高躅獨愧衰疲掌民社謾擁熊軒駕丹轂
身病何由安百姓才薄豈當尸厚祿巧匠居旁只坐觀

老乎其能袖間縮唯有過從相愛心青松不肯更寒燠
韓公開宴坐高堂帳帯垂紅窗綺綠簾深不散玉爐香
夜長屢剪銅盤燭從容談笑雜笙歌爛熳肴珍兼海陸
翩翩舞態學驚鴻嘹喨龍吟出橫竹與公進退晚相同
曾共憂勤參大麓酒量從茲減壯年豈復長鯨吞百谷
興來猶勉奉公歡金尊未醶先頽玉且同萬物樂時康
况慕諸君知止足

祖無擇

題袁州東湖盧肇石

袁山之陽秀水側草覆遺基誰氏宅皆云子發其姓盧
往以文章名籍籍宅中舊物何所存惟有嶙峋一區石
潤纏三尺高倍尋久卧塵沙羣瓦礫余心好異因獨往
下馬環觀聊拂拭地表可見十二三已足怪駭動魂魄
呼工運錤塹其旁挽以長絇百夫力雜然鼓譟登大車
恍爾如蒙巨靈擘選置東湖最佳處四面澄波映天碧
倚空突兀無與鄰頽覺亭臺增氣色彎環幽竇莫敢

擣恐有乖龍飛霧憲余嘗南游到陽朔衆峰矗矗春筍
植捫蘿踏蘚窮之遍若此竒卓曾未識郡人奔走來如
雲故老驚視復唧唧乃言此石遇真賞屈指於今年二
百沉埋曠代誰爾珍一日光價逾荆璧嗟余束髮大夫
後區區志尚惟孤直十年再謫非不窮猶慕堅純無改
易如何故老不我愚感物再三形歎息石不能言人有
言勿使他時重湮阨

鄭俠

次韻种道行衙賞蓮花

城中勢利如聚蛙聒聒鼓鬧窮兩衙忽聞攜尊命真賞
如見池湧金蓮花况茲危亭跨高輿極目四顧窮天涯
紅蕖繚繞幾數畝盛妝翠蓋相撐擎輿肩不換足已到
咫尺異彼窮幽遐居之自可換凡骨不必飲露餐朝霞
堂堂露衢不戶牖非此非彼無追賒幸時有酒共酩酊
不爾一啜先春茶漱枰小小較勝負徃徃笑語成謹謹
歸來清風恐飄帽月影已向西樓斜長舒兩脚就枕簟

一覺已聽清晨笳

馮山

八陣磧

永安宮前瀼西磧萬流峽口爭奔激秋濤卷地裂山谷
水落依然陣圖出陣形聚拳六十四傳是武侯親手跡
斯人管蕭豈足道身在巴東心漢室從容所遇皆法制
浩蕩胸中萬分一陰機暗與天地合壯氣曾將鬼神役
至今千載矻不動渺莽幾深難致詰豈徒豪傑重嗟賞

應有神靈長護惜廟偏裸裎七壯士酒炙紛紛走巫覡
萬事顛倒皆偶然卧龍無處沾餘灑

求劉忱明復龍圖為畫山水

晉唐諸公重小筆高價直與才名俱然多華丹少泉石
清格往往人間無至今百存無一二存者真偽難分區
營丘李成稱絕跡峰巒秀拔非常模穆之灑落亦其亞
王堂屏上瀟湘圖董屈許范凡數輩隐隐俗氣藏肌膚
乃知山水係絕品筆墨造化非功夫要之文章之緒餘

世上真巧歸吾儒益昌臺府少文字見性文空談毗盧
龍門雪景生坐隅山潛水與爭奔趨倚空直幹鬪孤聳
緣險古道盤縈紆擁衲禪僧對寂寥攜琴朝士來崎嶇
主人肆筆聊自娛新言默與天機符公家清白傳數世
經濟滿腹冰霜壺一言不用輒掉臂五年蜀使甘馳驅
時將素毫寫胸臆寧復意外分精粗復古雖清尚許格
與可亦壯非燕徒豈如公思脫羈束破碎嵩華傾江湖
窮冬從公禊窺看愛重不覺聲嗟吁靈峰北苑助蕭爽

雪不到地風號枯平生好畫已成癖寧借不許臨與摹
出公門下欠公筆有類海客遺明珠願公乘興一揮洒
東絹數幅光芬敷異時解組還故廬皎潔將伴林泉軀

趙袞

平江亭邀馮山允南同作

文公昔記滕王閣氣象終天拂寥廓崔顥題詩黃鶴樓
今日聲華還磊落安漢城頭有佳處江山清氣歸簾幕
少陵無人謫仙死不遇材豪終寂寞蒼苔滿地荆棘生

梁棟塵埃喧鳥雀風流賢守一登臨久倚闌干情不薄
夜來風月覺澄清天意人心如素約仙葩當見浮空來
幾百年來無此作嗟予好古今白頭到底支離材力弱
木桃或見致瓊瑤免對江山負慙怍

沈遼

白髮

山頭甘實半已黃領上白髮日更長青雲合散寄孤岫
世事悲歡空夕陽我欲乘風學禦寇冷然有意尋滄浪

滄浪無人誰與適青山路遠煙茫茫

送世美歸陽羨

我昔求為陽羨令輕舟已有鵠夷興最愛銅棺山峻極
自結籃輿陟雲徑銅棺山插南斗魁下視筆峰如突犀
太湖千里在睂睫高深從此窮攀躋欣然有意即獨往
明月夜夜眠荆溪當時便可跨黃鸝何意人間同木雞
飄飄數年如一夢邇來卜室齊山西故人多謝姚夫子
數枉車馬來山蹊秋風忽指陽羨去欲脫黃綬躬鋤犁

人生衣食苟自足何為卑辱趨塵泥田間九月白酒熟
鱸魚正肥多置罋老夫為君更破戒臨風引領長江堤

次韻和宋平

憶昔銜杯折梅處孤山寺前千丈塘橫遮青林鬪殘雪
暗入紅袖留青香徃遊都城雖屢賞縱有素豔終殊芳
莫辭遶林行百匝更嚼嫩藥薰愁腸

次韻酬李正甫對雪

苦寒冽冽日夜增朔風軒軒勢相凌遙山頑碧空峻嶒

高堂閒坐擁敝縵欲醕一杯意已仍結歌黃竹但伏膺
愁雲漫漫方四騰海氣上薄初不勝雪霰雜下風作稜
漸著弱柳頭鬚鬚半積軒砌發幽層枯樹兀兀愁饑鷹
紛然不已失溝塍一飲一斗心易矜試步薄冰猶戰兢
圓圭方璧降復登憶昔前年正嚴凝攝事大蜡清晨興
平生看雪實未曾健僕駿馬半醉乘或前或後望交朋
不辨明河與玉澗烈火萬炬氣不蒸被面唯有凍與冰
歸來心目如水澄喜看道旁剗作燈豐年為瑞古有稱

凍死何暇談鄒滕欲邀君飲恨不能相酬莫問準與繩

禪僧巖

瀟湘山水窮欲徧最後乃得禪僧巖禪僧成道久已化
獨有崖崿青巖巖降身入洞不甚險突兀三室誰彫剗
東西有道若蛇竇白雲罩罩門無緘持火旁行不知際
七穿八竅遙相銜涓涓乳泉白如雪由來此地殊仙凡
主人引我復深入行指嶼穴尤嵌晶中間石鼓有異響
擊拊想可參韶咸吾身久病苦下溼復畏神怪來邀撓

直趨出洞上南嶽。豁若巨海張雲帆。山花爛班出竹梢。
亦有禽鳥聲。謫謫欲還未可復。小駐日脚已過東岡杉。

贈別子瞻

平生雅游肴陽客。五年不見鬚已白。借田東坡在江北。
芟夷蓬蒿自種麥。相逢不盡一尊酒。故態那復論。歡戚
手抱阿武勸。餘憑維摩老夫失定力。老夫寂寂出三湘。
更欲卜居池水陽。薄田止須數十畝。田上更樹麻與桑。
老來正苦迫。生事清明雖近猶可秧。穢若可博乾麩。

以無易有遙相望我舟即行不可駐欲卜後會誠茫茫
他時有信若可寄不用辛苦為詩章

王令

題宣州太平縣衆樂亭為孫莘老作

今君亭架樂荒幽得地適與萬景投亭成雖名為衆樂
地僻無客誰與遊訟休民去吏隨散獨有文字與今留
把書開闔坐自笑回視令職忘卑陬昔聞酒賤喜易醉
今說魚美予何憂彈琴有聲尚近俗要解弦絕以意求

況持高懷居下邑志氣略與彭澤侔身嬰民憂手持版
心愛山水寧非偷景好不見但聞說使我耳目私相讎
亭前行跡不破草亭下野鳥常喧啾山雲朝噓翠巘出
海月夜下清溪浮春華夏蔭已可愛况使風雪回冬秋
惜予不得與快意共上岑峯望九州黃山聞好眼未識
夢想欲到迷無由圖傳粉墨固未好願假壯筆一攬收
果逢來篇騁雄勝若執造化窮雕鍊一時文工豈不偉
千里寄我何以酬耳昏俗語久欲洗為我一謝山前流

同顧保之游靈隱

閉門不知春色到
出門始見江梅開
行探幽泉至高捷
共坐巨石聊徘徊
時逢天風吹客懷
還有野鳥驚人來
林間盼惜所未歷
歸馬空載斜陽回

方惟深

偶造一園亭
不遇主人自盤礴
終日因題壁
間何年突兀庭前石
昔日何人種松栢
乘興閒來就榻眠
一枕春風君莫惜
城西今古陽山色
城中誰有千年宅

來往何必見主人主人自是亭中客

程顥

陪陸子履遊白石萬固

條山蒼蒼河流黃中蒲形勢天下強帝得賢侯殿一方
四年不更慰民望元豐戊午季春月上心閔雨愁黎蒼
使車四出走羣望我亦奉命來陝疆精誠感格天意順
詔書才下雨已霧病麥還青禾出土野農鼓舞歌君王
故人相見不道舊為雨歡喜殊未央聖主寬憂小臣樂

自可放蕩舒胸腸白石萬固皆勝地主人為我擣壺觴
況逢佳日俗所尚車馬未曉填康莊扶提十里雜老幼
迤邐千騎明戈槍初聽鳴鏃入青靄漸見朱旆輝朝陽
遨頭自是謝康樂後乘獨慙元漫郎侯來雖知有賓客
衆喜更為將豐穰臨溪坐石遍巖谷幽處往往聞絲簧
山光似迎好客動日景定為遊人長乘高眺遠興不盡
戀戀不知岐路忙人生汨沒苦百態得此盛事真難常
我辭佳境已惆悵侯亦那得久此鄉他時會合重相語

辜負泉石何能忘

程頤

聞侯舅應辟南征詩

辭華奔競至道離茫茫學者爭驅馳先生獨奮孟軻舌
扶持聖教增光輝志期周禮制區夏人稱孔子生關西
當塗聞聲交薦牘蒼生無福徒爾為道大不為當世用
著書將期來者知今朝有客關內至聞從大幕征南垂
南垂凶寇陷州郡久張蠭臂抗天威聖皇赫怒捷音緩

虎侯秉鉞驅熊羆宏才未得天下宰良謀且作軍中師
最爾小蠻何足殄庶幾聊吐胸中竒

文同

採藥歸晚因宿野人山舍

東巖陰深崖巘古夾澗垂泉結鷺乳我來採藥晚忘歸
試宿荆扉問雞黍春風滿林燈火冷一夜不眠山月苦
平明攜策下青蒼松葉紛紛洒新雨

山中新晴

山中新晴曉煙暖散帶頽冠漱巖畔海鹽未去猿鶴喜
柴桑初歸松菊亂林間餘雨時一滴嶺上飛雲忽雙斷
安能舉手恣扶搖欲共高鴻拂霄漢

送知府吳龍圖

國初以來治蜀者處置盡自乖崖公當時奏使便宜敕
不與天下州府同行之已及八十載奸宄消伏誰之功
因循至此漸抗敝有未曉者時相攻鞭笞小罪亦檢察
不許略出常科中下民知之頗不懼州縣往往藏羣兇

側身斂足未動者實以累朝恩澤隆公之初來蜀人喜
慈愛舊熟民情通衆心歡然恥犯法掠藥浮薄歸醇醴
盡將約束付僚吏興起學校還文翁二年美化極沾洽
遠近循服如偃風上將歸公問誰代當使間作如笙鏞
遂求元老得青社其人廊廟之宗工徃年鎮撫有異績
大旆再遣來於東公今與之合符去到必奉詔參夔龍
大資舊德固無慮剖判自出其心胸所憂厥後嗣之者
忠定良法還如空養頑活狡作淵藪不免剪殄煩興戎

因之憤懣久填臆言賤不得通九重願公上殿起居罷
第一用此聞宸聰

自斜谷第一堰沂舟上觀石門兩岸奇峰最為
佳絕

北風吹雲落寒水逆波刺船行五里層巒夾空抱叢石
萬劍側脊翠煙起草木枝葉自殊別禽蟲羽毛亦奇詭
安得雞冠數稜田便可誅茅此居止

徐積

再送端叔

關中日落時但見山相接塞上閉城時但聽吹蘆葉延
州平安火過早月出山頭照孤堡王家池上醉欲倒銅
鉢聲中詩已了落筆揮成露布草主人更索平戎表文
章意氣入冥杳金船插羽如飛鳥諸君鼓吹高牙曉大
纛門開撲餘燎壯士犀衣劔氣寒客身依舊青霞繞陸
生待寄梅花枝庾郎莫愛芙蓉好

送李昂長官

征南兵勢欲平蠻車聲殺氣秋風寒南國此時霜霰早
八月草黃楓葉丹江有渚兮山有麓君向洞庭何處宿
四垂大幕亂波平九疑山送愁風綠日斜葉落黃陵祠
月明風起清湘竹愁娥遠放峽雲來冤臣暮借江聲哭
鴈號孤喙度蒼梧猿叫哀腸抱霜木君看樵塢與漁邨
綠橘黃柑隨柿熟此行正合風騷情縣衙仍在衡山足
新嵐老翠滴吟窗風松雲溜生琴曲衡人側耳聽先聲
報道官來不碌碌可使汝農無逃田可使汝市無冤獄

汝胥可脫簿書煩汝民可免鞭笞辱日中放吏不坐廳
夜半投金不受囑廻時唯載俸餘錢茶滿衡山無一掬

送陳長官赴衡陽

楚天搖落霜風早山色依依江渺渺洞庭水寒帆影孤
鴈聲正在衡陽道君不見屈原憔悴賈生夭遺恨至今
猶未了日晚江頭船住時行人莫望江邊草

暴雨

玉女投壺天大笑千尋火炬當空照老龍行遲天忽怒

雷車壯士鎗連鼓黑鱗鐵甲十萬許急把銀河傾作雨

蘇軾

辛丑十一月十九日既與子由別於鄭州西門之外馬上賦詩一篇寄之

不飲何為醉兀兀此心已逐歸鞍發歸人猶自念庭闈
今我何以慰寂寞登高回首坡壠隔惟見烏帽出復沒
苦寒念爾衣裘薄獨騎瘦馬踏殘月路人行歌居人樂
僮僕怪我苦悽惻亦知人生要有別但恐歲月去飄忽

寒燈相對記疇昔夜雨何時聽蕭瑟君知此意不可忘
慎勿苦愛高官職

僕曩於長安陳漢卿家見吳道子畫佛碎爛可惜其後十餘年復見之於鮮于子駿家則已裝背完好子駿以見遺作詩謝之

貴人金多身復閒爭買書畫不計錢已將鐵石充逸少
法帖大王書中有殷鐵石字鐵石染武帝時人更補朱繇為道玄世所收吳道筆煙熏屋漏裝玉軸鹿皮蒼壁知誰賢吳生畫佛本神

授夢中化作飛空仙覺來落筆不經意神妙獨到秋毫
顛我昔長安見此畫歎息至寶空潛然素絲斷續不忍
看已作蝴蝶飛聯翩君能收拾為補綴體質散落嗟神
全志公彷彿見刀尺修羅天女猶雄妍如觀老杜飛鳥
句脫字欲補知無緣問君乞得良有意欲將俗眼為洗
湔貴人一見定蓋怍錦囊千紙何足捐不須更用博麻
縷付與一炬隨飛煙

二十七日自陽平至斜谷宿於南山中蟠龍寺

橫查晚渡碧澗口騎馬夜入南山谷谷中暗水響瀧瀧
嶺上疎星明煜煜寺藏嵒底千萬仞路轉山腰三百曲
風生磿虎嘯空林月黑驚磨竄修竹入門突兀見深殿
照佛青熒有殘燭媿無酒食待遊人旋斫杉松煮溪簌
板閣獨眠驚旅枕木魚曉動隨僧粥起觀萬瓦鬱參差
日亂千巖散紅綠門前商賈負椒薜山後咫尺連巴蜀
何時歸耕江上田一夜心逐南飛鵠

渼陂魚

霜筠細破為雙掩中有長魚如卧劙紫荇穿腮氣慘悽
紅鱗照座光磨閃攜來雖遠鼈尚動烹不待熟指先染
坐客相看為解顏香粳飽送如填塹早歲嘗為荆渚客
黃魚屢食沙頭店濱江易採不復珍盈尺輒棄無乃僭
自從西征復何有欲致南烹嗟久欠游儻瑣細空自腥
亂骨縱橫動遭砾故人遠餽何以報客俎久空驚忽瞻
莫道無辭信使頻西隣幸有庖鑿醞

司竹監燒葦園因名都廵檢柴貽勗左藏以其

徒會獵園下

官園刈葦歲留槎深冬放火如紅霞枯槎燒盡有根在
春雨一洗皆萌芽黃狐老兔最狡捷賣侮百獸常矜誇
年年此厄竟不悟但愛蒙密爭來家風回燄卷毛尾熱
欲出已被蒼鷹遮野人來言此最樂徒手曉出歸滿車
巡邊將軍在近邑呼來颯颯從矛义戍兵久閒可小試
戰鼓雖凍猶堪撾雄心欲搏南澗虎陣勢頗學常山蛇
霜乾火烈聲爆野飛走無路號且呀迎人截來喜逢箭

避犬逸去窮投且擊鮮走馬殊未厭但恐落日催栖鴉
弊旗仆鼓坐數獲鞍掛雉兔肩分麌主人置酒聚狂客
紛紛醉語晚更譁燎毛燔肉不暇割飲噉直欲追羲媧
青丘雲夢古所咤與此何啻百倍加苦遭諫疏說夷羿
又被賦客嘲淫奢豈如閒官走山邑放曠不與趨朝衙
農工已畢歲云暮車騎雖少賓殊佳酒酣上馬去不告
獵獵霜風吹帽斜

送安惇秀才夫解西歸

舊書不厭百回讀熟讀深思子自知他年明宦恐不免
今日棲遲那可追我昔家居斷還往著書不復窺園葵
竭來東遊慕人爵棄去舊學從兒嬉狂謀謬算百不遂
惟有霜鬚來如期故山松柏皆手種行且拱矣歸何時
萬事早知皆有命十年浪走寧非癡與君未可較得失
臨別惟有長嗟咨

送劉攽倅海陵

君不見阮嗣宗藏否不挂口休誇舌在牙齒牢是中惟

可飲醇酒讀書不用多作詩不須工海邊無事日日醉
夢魂不到蓬萊宮秋風昨夜入庭樹尊絲未老君先去
君先去幾時回劉郎應白髮桃花開不開

送文與可出守陵州

辟上墨君不解語見之尚可消百憂而况我友似君者
清節凜凜欺霜秋清詩健筆何足數逍遙齊物追莊周
奪官遣去不自覺曉梳脫髮誰能收江邊亂山赤如赭
陵陽正在千山頭君知遠別懷抱惡時遣墨君解我愁

遊金山寺

我家江水初發源宦游直送江入海聞道潮頭一丈高
天寒尚有沙痕在中泠南畔石盤陀古來出沒隨濤波
試登絕頂望鄉國江南江北青山多羈愁畏晚尋歸楫
山僧苦留看落日微風萬頃蘚文細斷霞半空魚尾赤
是時江月初生魄二更月落天深黑江心似有炬火明
飛焰照山棲鳥驚悵然歸臥心莫識非鬼非人竟何物
是夜所見如此江山如此不歸山江神見怪驚我顧我謝江神

豈得已有田不歸如江水

自金山放船至焦山

金山樓觀何耽耽撞鐘擊鼓聞淮南焦山何有有修竹

採薪汲水僧兩三雲霾浪打人迹絕時有沙戶祈春蠶

吳人謂水中可田者為沙我來金山更留宿而此不到心懷慙同游

盡返決獨往賦命窮薄輕江潭清晨無風浪自湧中流

歌嘯倚半酣老僧下山驚客至迎笑喜作巴人談

焦山長老

中江人也自言久客忘鄉井只有彌勒為同龕因眠得就紙

帳暖飽食未厭山蔬甘山林饑卧古亦有無田不退寧
非貪展禽雖未三見黜叔夜自知七不堪行當投劾謝
簪組為我佳處留茅菴

次韻子由柳湖感物

憶昔子美在東屯數間茅屋蒼山根嘲吟草木調蠻獠
欲與猿鳥爭啾喧子今憔悴衆所棄驅馬獨出無徃還
惟有柳湖萬株柳清陰與子供朝昏何為譏評不少借
生意凌挫難為繁柳雖無言不解愠世俗乍見應慚然

嬌姿共愛春濯濯豈問空腹修蛇蟠朝看濃翠傲炎赫
夜愛疎影搖清圓風翻雪陣春絮亂蠹響啄木秋聲堅
四時盛衰各有態搖落悽愴驚寒溫南山孤松積雪底
抱凍不死誰復賢

送蔡冠卿知饒州

吾觀蔡子與人遊掀髯笑語無不可平時儻蕩不驚俗
臨事迂闊乃過我橫前坑穿衆所畏布路金珠誰不裹
邇來變化驚何速昔號剛強今亦頗憐君獨守廷尉法

歲晚却理鄱陽柁莫嗟天驥逐羸牛欲試良玉須猛火
世事徐觀真夢寐人生不信長坎軻知君決獄有陰功
他日老人酬魏顆

臘日遊孤山訪惠勤惠思二僧

天欲雪雲滿湖樓臺明滅山有無水清石出魚可數林
深無人鳥相呼臘日不歸對妻孥名尋道人實自娛道
人之居在何許寶雲山前路盤紆孤山孤絕誰肯廬道
人有道山不孤紙窗竹屋深自暖擁褐坐睡依圓蒲天

寒路遠愁僕夫整駕催歸及未晡出山迴望雲木合但見野鶴盤浮圖茲遊淡薄歡有餘到家悅如夢蘧蘧作詩火急追亡逋清景一失後難摹

遊靈隱寺得來詩復用前韻

君不見錢塘湖錢王壯觀今已無屋堆黃金斗量珠運盡不勞折簡呼四方宦遊散其孥宮闈留與閑人娛盛衰哀樂兩須臾何用多憂心鬱紆谿山處處皆可廬最愛靈隱飛來孤喬松百丈蒼髯鬚擾擾下笑柳與蒲高

堂會食羅千夫撞鐘擊鼓喧朝晡凝香方丈眠氍毹絕
勝絮被縫海圖清風徐來驚睡餘遂超羲皇傲几遽歸
時棲鴉正畢逋孤煙落日不可摹

越州張中舍壽樂堂

青山偃蹇如高人常時不肯入官府高人自與山有素
不待招邀滿庭戶卧龍蟠屈半東州萬室鱗鱗枕其股
背之不見與無同狐裘反衣無乃魯張君眼力窺天奧
能遣荆棘化堂宇持頤宴坐不出門收攬奇秀得十五

才多事少厭閒寂臥看雲烟變風雨筍如玉箸棋如簪
強飲且為山作主不憂兒輩知此樂但恐造物怪多取
春濃睡足午窗明想見新茶如潑乳

遊徑山

衆峰來自天目山勢若駿馬奔平川中塗勒破千里足
金鞭玉鐙相回旋人言山住水亦住下有萬古蛟龍淵
道人天眼識王氣結茅宴坐荒山巔精誠貫山石為裂
天女下試顏如蓮寒窗暖足來撲朔夜鉢呪水降蜿蜒

雪梅老人朝扣門願為弟子長參禪爾來廢興三百載
奔走吳會輸金錢飛樓湧殿壓山破朝鐘暮鼓驚龍眠
晴空偶見浮海蜃落日下數投郵鶯有生共處覆載內
擾擾膏火同烹煎近來愈覺世議隘每到寬處差安便
嗟余老矣百事廢却尋舊學心茫然問龍乞水歸洗眼
欲看細字銷殘年

試院煎茶

解眼已過魚眼生颼颼欲作松風鳴蒙茸出磨細珠落

眩轉統甌飛雪輕銀瓶瀉湯誇第二未識古人煎水意
君不見昔時李生好客手自煎貴從活火發新泉又不
見今時潞公煎茶學西蜀定州花瓷琢紅玉我今貧病
常苦饑分無杯盃捧蛾眉且學公家作茗飲溥爐石铫
行相隨不用撐腸拄腹文字五千卷但願一甌常及睡
足日高時

孫莘老求墨妙亭詩

蘭亭繭紙入昭陵世間遺跡猶龍騰顏公變法出新意

細筋入骨如秋鷹徐家父子亦秀絕字外出力中藏稜
嶧山傳刻典刑在千載筆法留陽冰杜陵評書貴瘦硬
此論未公吾不憑短長肥瘠各有態玉環飛燕誰敢憎
吳興太守真好古購買斷缺揮縑繒龜趺入坐螭隱辟
空齋晝靜聞登登竒蹤散出走吳越勝事傳說誇友朋
書來乞詩要自寫為把栗尾書溪藤後來視今猶視昔
過眼百世如風燈他年劉郎憶賀監還道同時須服膺

將之湖州戲贈莘老

餘杭自是山水窟側聞吳興更清絕湖中橘林新著霜
溪上苔花正浮雪顧渚茶芽白於齒梅溪木瓜紅勝頰
吳人膾縷薄欲飛未去先說饅涎垂亦知謝公到郡久
應怪杜牧尋春遲鬢絲只好對禪榻湖亭不用張水嬉
遊道場山何山

道場山頂何山麓上徹雲峰下幽谷我從山水窟中來
尚愛此山看不足波湖行盡白漫漫青山忽作龍蛇盤
山高無風松自響誤認石齒號驚湍山僧不放山泉出

屋底青池照瑤席階前合抱香入雲月裏仙人親手植
出山回望翠雲巒碧瓦朱欄縹緲間白水田頭問行路
小溪深處是何山高人讀書夜達旦至今山鶴鳴夜半
我今廢學不歸山山中對酒空三歎

至秀州贈錢端公安道并寄其弟惠山老

鴛鴦湖邊月如水孤舟夜榜鴛鴦起平明繫纜石橋亭
慚愧冒寒鬚御史結交最晚情獨厚論心無數今有幾
寂寞抱關歎蕭生耆老執戟哀揚子怪君顏采却秀發

無乃遷謫反便美天公欲困無奈何世人共抑真疏矣
毗陵高山錫無骨陸子遺味泉水齒賢哉仲氏早拂衣
占斷此山長洗耳山頭望湖光潑眼山下濯足波生指
儻容逸少問金堂記與稽康留石髓

法惠寺橫翠閣

朝見吳山橫暮見吳山縱吳山故多態轉側為君容幽
人起朱閣空洞更無物惟有千步岡東西作簾額春來
故國歸無期人言秋悲春更悲已泛平湖思濯錦更看

橫翠憶峨眉雕欄能得幾時好不獨憑欄人易老百年
興廢更堪哀懸知草莽化池臺遊人尋我舊遊處但覓
吳山橫處來

往富陽新城李節推先行三日留風水洞見待
春山磔磔鳴春禽此間不可無我吟路長漫漫傍江浦
此間不可無君語金鯽池邊不見君追君直過定山邨
路人皆言君未遠騎馬少年清且婉風囀水穴舊聞名
只隔山溪夜不行溪橋曉溜浮梅萼知君繫馬囀花落

出城三日尚逶遲妻孥怪罵歸何時世上小兒誇疾走
如君相待今安有

宿海會寺

藍輿三日山中行山中信美少曠平下投黃泉上青冥
綫路每與猿狖爭重棲束縛遭澗坑兩股酸哀饑腸鳴
北渡飛橋踏彭鏗繚垣百步如古城大鐘一撞千指迎
高堂延客夜不扃杉槽漆斛江湖傾本來無垢洗更輕
倒牀鼻息四鄰驚紈如五鼓天未明木魚呼粥亮且清

不聞人聲聞履聲

和錢安道寄惠建茶

我官於南今幾時嘗盡溪茶與山茗胸中似記故人面
口不能言心自省為君細說我未暇試評其略差可聽
建溪所產雖不同一天與君子性森然可愛不可慢
骨清肉膩和且正雪花雨脚何足道啜過始知真味永
縱復苦硬終可錄汲黯少憇寬饒猛草茶無賴空有名
高者妖邪次頑礦體輕雖復強浮汎性滯偏工嘔酸冷

其間絕品豈不佳張禹縱賢非骨鯁葵花玉萼不易致
道路幽峻隔雲嶺誰知使者來自西開緘磊落收百餅
嗅香嚼味本非別透紙自覺光炯炯粧糠團鳳友小龍
奴隸日注臣雙井收藏愛惜待佳客不敢包裹鑽權倖
此詩有味君勿傳空使時人怒生癢

大風留金山兩日

塔上一鈴獨自語明日顛風當斷渡朝來白浪打蒼崖
倒射軒窗作飛雨龍驤萬斛不敢過漁艇一葉從掀舞

細思城市有底忙却笑蛟龍為誰怒無事久留僅僕怪
此風聊得妻孥許瀟山道人獨何事半夜不眠聽粥鼓

惜花

錢塘吉祥寺花為第一壬子清明賞會最盛金盤
綵籃以獻於座者五十三人夜歸沙河塘上觀者
如山爾後無復繼也今年諸家園圃花亦極盛而
龍興僧房一叢亦奇但衰病牢落自無以發興耳
昨日雨雹如此花之存者有幾可為歎息也

吉祥寺中錦千堆
前年賞花真盛哉
道人勸我清明來
腰鼓百面如春雷
打徹涼州花自開
沙河塘上插花回
醉倒不覺吳人咍
豈知如今雙鬢催
城西古寺沒蒿萊
有僧閉門手自裁
千枝萬葉巧剪裁
就中一叢何所似
瑪瑙盤盛金縷杯
而我食菜方清齋
對花不飲花應猜
夜來雨雹如李梅
紅殘綠暗吁可哀

大雪青州道上有懷東武園亭寄孔周翰

超然臺上雪城郭
山川兩奇絕
海風吹碎碧琉璃
時見

三山白銀闕
蓋公堂前雪綠窗
朱戶相明滅
堂中美人
雪爭妍
粲然一笑玉齒頰就中山堂
雪更奇
青松怪石
亂瓊絲
惟有使君遊
不歸五更馬上愁
斂眉君不見淮
西李侍中
夜入蔡州縛
取吳元濟
又不見襄陽孟浩然
長安道上騎驢吟
雪詩何當閉門飲美酒
無人毀譽河東守

書韓幹牧馬圖

南山之下汎渭之間想見開元天寶年八坊分屯隘秦

川四十萬匹如雲煙驅駟駒駱駢驅驥驅驥驅驥驅驥
駕龍顧鳳頸綈且妍奇姿逸德隱駕頑碧眼胡人手足
鮮歲時翦刷供帝閑柘袍臨池侍三千紅妝照日光流
淵樓下玉螭吐清寒往來蹴踏生飛湍衆土舐筆和朱
鉛先生曹霸弟子韓廡馬多肉尻雁圓肉中畫骨誇尤
難金羈玉勒繡羅鞍鞭箠刻烙傷天全不如此圖近自
然平沙細草荒芊綿驚鴻脫兔爭後先王良挾策飛上
天何必俯首服短轍

和子由與顏長道同遊百步洪相地築亭種柳
平明坐衙不煖席歸來閉閣間終日卧聞客至側屨迎
兩眼蒙籠餘睡色城東泗水步可到路轉河洪翻雪白
安得青絲絡駿馬蹙蹋飛波柳陰下奮身三大兩蹄間
振鬣長鳴身自乾少年狂興久已謝但憶嘉陵遶劍闕
劍闕大道車方軌君自不去歸何難山中故人應大笑
築室種柳何時還

章質夫寄惠崔徽真

王釵半脫雲垂耳亭亭芙蓉在秋水當時薄命一酸辛
千古華堂奉君子水邊何處無麗人近前試看丞相嗔
不如丹青不解語世間言語元非真知君被惱更愁絕
卷贈老夫驚老拙為君援筆賦梅花未害廣平心似鐵
韓幹馬十四匹

二馬並驅攢八蹄二馬宛頸駿尾齊一馬任前雙舉後
一馬却避長鳴嘶老顧奚官騎且顧前身作馬通馬語
後有八匹飲且行微流赴吻若有聲前者既濟出林鶴

後者欲涉鶴俛啄最後一匹馬中龍不嘶不動尾搖風
韓生畫馬真是馬蘇子作詩如見畫世無伯樂亦無韓
此詩此畫誰當看

答呂梁仲屯田

亂山谷杳闔彭門官居獨在懸水邸居民蕭條雜麋鹿
小市冷落無雞豚黃河西來初不覺但訝清泗流奔渾
夜聞沙岸鳴甕盎曉看雪浪浮鷗鷗呂梁自古喉吻地
萬頃一抹何由吞坐觀入市卷閭井吏民走盡餘王尊

計窮路盡欲安適吟詩破屋愁鳶蹲歲寒霜重水歸壑
但見屋瓦留沙痕入城相對如夢寐我亦僅免為魚鼈
旋呼歌舞雜訟笑不惜飲醻空瓶益念君官舍冰雪冷
新詩美酒聊相溫人生如寄何不樂任使絳蠟燒黃昏
宣房未築淮泗滿故道堙沒瘡痍存明年勞苦應更甚
我當畚鍤先黥髡付君萬指伐頑石千錘雷動蒼山根
高城如鐵洪口快談笑却掃看崩奔農夫掉臂免狼顧
秋穀布野如雲屯還須更置軟脚酒為君擊鼓行金樽

欽定四庫全書

御選宋詩卷二十七

御選宋詩卷二十七

謹案卷二十六第二十七頁後二行大舟如山起
牙檣按臨川集注云一本無此一句

卷二十七第四頁前二行短鈎長鉢相撐擬刊本
擬訛擬據韻書改

第二十一頁後二行素絲斷續不忍看刊本看訛
去據東坡集改

第二十七頁前五行水清石出魚可數刊本石出
訛出石據東坡集改

第三十七頁後七行高城如鐵洪口快接東坡集
快作決此處疑訛



總校官庶吉士臣侍朝
校對官檢討臣蕭九成
謄錄舉人臣李駟